

四庫全書

集部

欽定四庫全書

集部
明詩綜卷
四十一

詳校官中書_臣涂日煥

主事銜_臣徐以坤覆勘

總校官降調編修_臣倉聖脉

校對官庶吉_臣潘曾起

謄錄監生_臣楊恪

欽定四庫全書

明詩綜卷四十

翰林院檢討朱彝尊編

唐 臯 一首

臯字守之歙縣人正德甲戌賜進士第一授修

撰進侍講學士

明妃曲

黃金不買畫圖中從此春花閉漢宮
到得君王識傾國

無人主議罷和戎

蔡昂 一首

昂字衡仲山陽人正德甲戌賜進士第三除翰林編修累官禮部左侍郎贈尚書有頤貞堂橐送朱伯仁任四川行都司斷事

白帝秋風動烏蠻夕照含憐君游宦處地極勢西南殊俗聊相問軍謀亦共參雄飛方自此休說鬢髭髻

霍韜 一首

韜字渭先南海人正德甲戌進士累官太子少保禮部尚書兼翰林院學士贈太子太保謚文敏有渭厓文集

贈方棠陵用陶飲酒韻

張弓射飛鳥巧者猶能得君子履周道豈為多岐惑義命良獨安行止順通塞遠之垂萬世近之範一國珍重君此行時哉惟語默

劉儲秀 一首

儲秀字士奇咸寧人正德甲戌進士繇刑部主
事累遷湖廣按察使歷戶部侍郎仕至兵部尚
書

送龍長史之武昌

荆衡山漠漠江漢水湯湯送汝從茲去何時到武昌楚
筵堪設醴漢署憶含香北上多鴻鴈音書好寄將

簡霄

二首

霄字騰芳新喻人正德甲戌進士歷官南京兵

部右侍郎有蓉溪集

過雪埧番寨

雪埧傍流沙風煙幾十家蓬頭男跽菁編髮婦耕畬皮
甲張藤盾毛衣綴線麻也知天子使羅拜接江涯

潞河舟中作

潞水經年別風塵又覺非岸蘆迎櫂舞檣燕掠人飛澤
國魚梁竭江城候吏稀人煙沙草外一縷起斜暉

陸杰一首

卷四十一
杰字元望平湖人正德甲戌進士授兵部主事
諫南巡廷杖後遷陝西按察副使終工部侍郎
有集

客舍

行役殊無已其如歲晏何
宦情因拙澹鄉夢入秋多月
巷千砧發霜天一雁過
吾廬今夜好可惜掩松蘿

吳鎧

二首

鎧字文濟陽穀人正德甲戌進士授行人擢監

察御史升福建按察副使歷陝西叅政雲南按
察使終僉都御史

書營平侯祠壁

白草連天遠黃雲出塞平
霜笳吹漢月寒笛弄秦聲
北海猶傳箭西戎未息兵
屯田當寧意寧惜度金城

涼州

聞道涼州戍連年去未回
健兒多戰死曠騎至今來
白骨紛無數黃雲慘不開
龍城秋夜月羌笛不勝哀

林大輅 二首

大輅字以乘莆田人正德甲戌進士以工部員外郎諫南巡予杖繫獄謫判夷陵州嘉靖初起

江西按察僉事歷副都御史巡撫湖南自劾歸

有愧瘖集

林茂貞云二山詩在仕途者忠憤激烈無依阿取容之態在林居者冲適

雅淡無憤時嫉世之心要皆出於性靈非騷人

墨客風雲月露之作也王應時云二山詩典

麗雋遠采入堂奧謝山子云林詩樸厚可比

蔡忠惠林雨可云二山詩鍛鍊而不傷自然

靜志居詩話二山與南泠最相契詩亦近之第稍遜耳品當在李川父孟望之間

弔馬伏波祠

野渡維江舸荒祠薦澗芹魚龍喧永晝日月照迷津阻
絕征蠻路艱危報主身只今嗟薏苡臨弔幾傷神

蔣子雲都水定居西長安門外

南冷三載賦閒居春日長安近卜廬苑樹飛煙分客榻
禁鐘浮月散朝車揚雄天祿多奇字方朔金門有諫書
相望西橋應不遠莫教風雨往來疎

林炫

四首

炫字貞孚閩縣人尚書庭棉子正德甲戌進士

歷官通政司叅議有榕江集

傷歌行

楚人不識鳳謂是五色雞魯人不識麟謂是麕而蹄天
時苟不值賢聖終見嗤爰居避海風享祀將奚為寄言
明哲士樂命安蓬閨

有感用杜韻

將帥承新渥軍儲惜去年似聞千里霧猶蔽九重天貴

戚爭開府烽煙近到邊玉闕何日閉遺恨自張騫

十四夜月

今夜揚州月清光已勝前遙升滄海外先到客亭邊雲
度同飄忽風來一灑然細瞻金粟影猶少半分圓

次韻贈朱青岡太守郊行

聞得農人語鶯花未足憐夕陽牛背笛春雨郭東田政
簡官如水時豐俗自便村村鳴社鼓歡喜說今年

孫存一首

存字性甫滁州人正德甲戌進士歷官河南左
布政使有豐山集

劉都幕泉亭

濫泉沸山巔沆泉迸山足一鷺飲東泉飛向西泉浴

周在

四首

在字善卿太倉州人正德甲戌進士除知寶坻
縣擢陝西道御史歷官浙江右叅政有燕京逮
事錄行臺紀興

詩話善卿獨攄胸臆不事規撫正如繁音
送奏忽聆于為于曲縱無妙理具足清機

悼陳司李

保定推官被姦
民誣奏死于獄

灼灼木槿花楚楚蜉蝣羽朝陽耀容華日夕不知處人
生非金石誰能不銷腐昨日同舍人今朝成糞土死者
已無知生者徒自苦獨坐掩園扉哀哀淚如雨

秋夕感懷

月轉虛簷向夜闌孤臣不寐望回鑾重門擊柝聲何急
半壁殘燈影亦寒梁獄久淹書未上齊廷難遇瑟休彈

凌風欲借仙槎去天上銀河水定乾

初下詔獄作

薄宦叨民牧窮囚與寇鄰

撫監有官民之分官監稍潔予獨下民監與強盜重囚雜

處

不辭羅法網直恐玷儒紳縲紲嗟何罪遭逢慨不辰

鄒陽書未上賈傅策誰陳日有泥塗辱旁無骨肉親吟

鬚經鎖斷鞭血污衣新野薤晨充饌乾蘆夜作茵亂蠅

沾食穢毒蝎螫膚辛厄似樊籠烏危如涸轍鱗經旬忘

盟櫛長日足悲呻竊共人愁語徒勞更怒嗔獨行良踣

踣羣吠尚信信薄力誅求困虛情鍛鍊真株連殊未已
文致竟無因理直終何補錢多信有神虎翻令傳翼象
莫顧焚身禍已延吾黨冤猶念此民病亡俱老弱瘦死
半飢貧地下多新鬼天涯少故人禁嚴消息絕家遠夢
魂頻自笑心如鐵相看淚滿巾尚祈欽恤詔指日下楓
宸

閨怨

江南二月試羅衣春盡燕山雪尚飛應是子規啼不到

故鄉雖好不思歸

桑溥一首

溥字伯雨濮州人正德甲戌進士歷官按察使

榆林道中

迢遞榆關道西風卷客旌寒沙迷古塞落日下孤城水
險遮蕃騎山高列漢營君王方偃武邊將莫言兵

顧可久一首

可久字與新無錫人正德甲戌進士歷官廣東

按察副使有洞陽集

秋懷

異域滄溟上孤城斥鹵中經過稀漢使託處雜黎戎最

苦黃茆瘴兼愁鐵颶風

集本作日遠天何際雲荒秋不窮

誰能忍羈旅

轉泊逐飄蓬

李

濂

九首

濂字川父祥符人正德甲戌進士授沔陽知州

遷寧波府同知終山西按察僉事有嵩渚集

廖鳴

吾云川父詞藻俊拔迥出塵表 俞汝成

云川父詩率意走筆不事鍛鍊有古朴風

詩話嵩清集凡百卷最稱繁富然不甚剪裁其
持論以明初吳中四傑為歸求其神似未免類
桓宣武之擬

劉太尉也

游呂公洞

窈窕呂公洞逶迤玉泉側澗流緬松門石梁亘雲壁始
入日匿影徐轉天漏白靈窟度縈迴細徑緣歌仄杖邊
霏漸分衣上霰微積紫芝敷異芬瑤草弄明色窮猿倒
窺人仙鼠飛避客遙遙薜蘿陰嫋嫋蒼翠夕金膏欣可

餐石髓恨難識意愜諸妄遺神超萬緣釋伊予事沈冥
夙負山水癖曩聞呂仙名茲覽修真跡丹爐滅灰燼石
牀有苔蝕一遊洞庭波千載杳消息珪組知爾忘煙霞
恣所適私哂名利心蹶躓竟何益

雪竇寺妙高臺

吾聞妙高臺海涌金芙蓉上有萬古苔虎豹留其蹤日
月挂天柱煙霞韜石峰所嗟異僧去寂寞青山鐘

含珠林

佛有舍利珠瘞之海東石夜來九龍爭風雨拔林柏六
丁紛呵護寶物安所宅至今月黑時光騰幾千尺

石竇

石竇海眼通乳泉四時洩仰睇杳而深誰剜翠屏裂青
巉千峰雲白含萬年雪膏砂原異竅鳥鼠或同穴

桃花坑

高僧飛錫地錦石名桃花吾非勾漏令乃此逢丹砂雲
中吠仙犬洞底流胡麻定有逃秦者人煙隔暮霞

太原中秋

紫塞中秋月青天萬里情他鄉一尊酒獨對太原城水
霧戎戎合陰蟲故故鳴雁門諸戍苦莫遣照邊營

春興

碧草城南路不分野人詩思正紛紜聊隨謝客尋幽壑
何必桓譚識古人春日苦耽新秫酒洞天思謁大茅君
東風吹起花如霰腸斷梁臺日暮雲

秋懷

瀟湘楓落鰕魚肥
楚客懷歸未得歸
頻憶鳳城詢北使
尚聞龍舸駐南畿
驚心關塞旌旗動
旅食江湖諫疏稀
本乏涓埃裨郡國
擬將生事付漁磯

良鄉道中

沙雁衝車起洲鶯隔岸聞
暮看霞氣近疑是漢宮雲

蔣山卿

九首

山卿字子雲儀真人正德甲戌進士授工部主
事諫南巡廷杖謫南京前府都事歷刑部郎中

出知河南府改潯州再改南寧升廣西叅政有

南冷集

顧華玉云子雲詩天才溢發可歌可感使將來者見之則凡鉅釘其字雕刻其

文艱深其思拗曲其體不發于情而并氣格音節亡之者皆可怛然省矣 俞汝成云南冷達生有容德詩似其人 王元美云蔣子雲如白蠟糖看似甘美不堪咀嚼 顧玄言云叅政才華朗邁五言學杜恨乏奇語

詩話子雲詩如水精淨域盡埽游塵微嫌境太淺爾子三人孝常孝若孝或皆能詩吳山遙入戶江水近通渠孝常句也鴈度三更月烏栖獨樹霜孝若句也夕陽新雨後明月落潮時孝或句也雖未出羣亦自濟濟

門有萬里客

門有萬里客，駕言發京都。問客京都來，世事比何如。公
車待詔士，北闕新上書。崢嶸片言合，恩寵一朝殊。升君
白玉堂，上君黃金塗。賜與出內藏，宅第夾皇居。華棖鏤
璧璫，文牕結綺疏。珠履竝侍從，紫衣備走趨。高門平旦
開，飛蓋已填衢。官爵入掌握，才俊待吹噓。顧盼遺光彩，
俯仰生榮枯。貴盛豈不羨，尊幸古來無。天運相代謝，日
月有盈虛。時命苟未逢，進取何所圖。執戟疲揚雄，文園

病相如今君守寂寞辛苦徒嗟吁

陳緯度云此篇蓋為蘿峰而作

雜感

吾聞青海外赤水西流沙
神人生鳥翼蓬首亂如麻
出入乘兩龍左右臂雙蛇
中有不死藥奇麗更紛葩
琅玕墜珠英玕琪散瑤華
雙雙交相并文文自交加
我願從之游萬里跡非賒
但恐非人類壽命其奈何

夏日田園即事 二首

沈沈夜來雨泱泱川上平
田家趁時作驅牛急晨耕
遙

遙阡陌間肅肅老少并札札耒與耜
伊伊桔槔聲紆迴野水入綿延禾稼
盈劬苦事一時倏忽見秋成四體雖
云疲所貴惟此生此生各有分胡乃
不自營寥寥千載下寧知沮溺情

東菑耘事畢老翁自閒閒鼓腹何所知
徘徊墟落間斜日上高原一望江南山
寨林玩柔荑涉澗弄潺湲欣然適其
適日黑始來還了無一可說呼兒掩
柴關

燕歌行

清霜落木寒蕭森白日既匿光景沈闕山迢迢絕信音
目極千里傷人心念君他鄉久滯淫長夜展轉憂難任
空閨寂寞愁錦衾涕零如雨不可禁泠泠纖指彈鳴琴
張弦促柱發哀吟月明洞戶流清陰涼風飄飄吹我衿
起看樹上雙棲禽雄鳴雌飛守故林我何茕茕獨至今

郭縣晚行

漠漠平沙闊荒荒白日低朔雲孤鴈度昏樹亂鴉棲
戍鼓聽猶隔村煙望欲迷關山有戎馬憐爾尚征西

八月十五夜懷京中舊遊

今夕那無月他鄉獨上樓
兵戈添白髮幕府滯清秋
對酒傷前事尋詩數舊遊
呼童把官燭漏盡不能休

送林以乘赴任江西僉憲

并序

正德己卯上將南巡予與以乘孟循同上疏忤
旨下獄且被責貶而孟循死矣今上即位召還
京方忻會晤而以乘有茲擢感舊叙別愴然興
懷凡二十六韻

先帝昔巡幸小臣同上書事危攀折檻情切止乘輿未
得陳丹悃空令伏玉除天心那可問皇怒竟何如氛霧
昏霾久雷霆震擊餘傷魂逮囹圄鞭血濺衣裾半刺猶
憐爾孤遊孰起予聯翩嗟去國蕭索苦離居聖哲臨宸
極清明開太虛王綱重照洗姦孽盡誅鉏紫詔恩初降
蒼生憤始攄逐臣皆見召舊故復相於禁閤還通籍官
曹竝直廬感時唯涕淚歎逝重欷歔從宦心俱嬾求名
術本疎祗應旅進退敢望獨吹噓翻怪無鳴鶴堪憐似

戲狙十年才易組六月便驅車去作長途別行將大暑
祛涼雲停碧樹淥水汎紅蕖南國秋風早西江白露初
霜威迎獬廌月冷改蟾蜍世路多岐側斯文有卷舒身
須混涇渭譽欲等璠璣霄漢看鷹隼江湖覓鯉魚與君
生死分分手一躊躇

南巡歌

萬乘回鑾出楚關遙聞鳳吹百花間聖心不為閒遊豫
千里河山一月還

薛蕙

四十四首

蕙字君采亳州人正德甲戌進士授刑部主事

改吏部歷貢外郎中以議大禮下詔獄尋復職

未幾罷歸屢薦不出有西原集

徐子元云君采俊麗康樂殆不

是過

王予正云西原窮探載籍采擷英華程

古摘詞超入魏晉晚乃刊落繁華潛心性命造

詣深邃自得實多今之人但知為詩人已耳

文徵仲云西原先生詩溫雅麗密有王孟之風

樂府歌詞追躅漢魏時何大復李空同文章重

天下摘詞發藻凌轢漢晉朝野翕然尚之先生

雖稍後出而聲華望實略相曹耦唐應德云

薛詩從瞿老書來得虛靜語李予西云西原

尚則元風聿祛末習漱羣籍之芳潤擷百氏之英勇一時詞囿邈焉寡儔王元美云薛君采

如宋人葉玉幾奪天巧又如倩女臨池疎花獨笑穆敬甫云薛公理學著稱詩亦有致顧

玄言云考功詩譬之馬飾金羈連翩蹀躞穩步康莊了無跼蹐之跡黃清甫云薛詩吐辭秀

潤布意密緻而調合作者名篇實多其咏懷則取法於嗣宗雜詩則準的於景陽游仙則規摹

於景純雖不逼似庶幾太康之音蔣仲舒云薛詩如刻錦雲霞疊石島嶼欲以人巧而擬自

然未及大觀能無激賞間作冲澹若落花游絲情致可喜稍更骨氣便復無儔矣陳仲醇云

薛公詩一毫塵垢不入筆端由其胸中曠達無染故也陳卧子云君采詩如貴主初降雲輶

鸞輅縣珠編貝自然莊麗沈山子云君采詩弘崢嶸瑟如鼓丘中之琴令人神往鍾廣漢

云君采五言兼大小謝之長五律綜初盛唐之妙長句則效李頎長律則宗子美絕句小詩亦多妙

諧

詩話薛公南巡評吏大禮正人條達詞華淵源理學古詩自河梁以暨六朝近體自神龍以迄五季靡不句追字琢心摹手追劍北地之菁英具信陽之雅藻兼迪功之精詣卓然名家又云君采年十二能詩王子衡謫判亳州賞之曰可繼何李故其詩云東髮從師王浚川文章衣鉢幸相傳爾時評我李何似白首摧頽只自憐其與用修論詩云近日作者摹擬蹈襲致有拆洗少陵生吞子美之譴求近性情無若古調直以沿流討源自許晚年究心講學於詩不師擊壤尤人所難

君子行

君子思危懼不終日衆人居安沒齒自逸君子思退如
迫于淵衆人思進如逐于田損益之變何其相反苟非
明智孰能及遠人知其終莫知其始吉凶之萌鮮不由
已上天無私何怨何親福不擇家禍不索人道有險易
事有從違嗚呼小子慎爾所之

善哉行

來日大難痛心疾首今日為樂莫懲其後大難如何昊

天不嘉吉凶有時人莫之知鹿之游斯在彼中野庖人
調和將以為脯翩翩白龍好是魚服豫且射之載中其
目少康出畋不復其舍戎王朝卧迺縛尊下式戒在斯
式備在終匪戒匪備害于其躬天命戾止匪夙則莫勉
爾在位無俾天怒

效阮公詠懷

七首

翔鶴赴長飈翩翩戾高冥舉翮覆白日伏頸雲間鳴
謝野田雀黽勉營此生與子各殊塗無用相譏評

飄風振玄幕若木零朱華六龍匿西山濛汜揚其波翩
翩市中子於心太回袞不見顛顚色但聞慷慨歌卑危
誠未遠禍亂豈在多人人恤其私安能尚顧他已矣勿
重陳嗟予可奈何

朝登古臺上遙望大河陰朱明來自南隆暑倏已臨丹
霞曜陽景渥露霑玄林炎風振曾柯鳴蟬響哀音四時
代終始變化迭相尋盛長固殊昔遲暮方在今感物切
悲情愴歎傷我心

生才良不幸處世誠獨難揚蛾興妒階懷璧賈罪端靈
均既見放韓非亦自殘奉身失所從慷慨使我歎

天上何所有上有九重臺日月闢房牖河漢界兩階白
虎夾路隅青龍啾啾啼五嶽當束脯四海充一杯衣裳
被雲氣左右結雙蜺彗星垂為帶北斗束為觶舉足歷
顓蒼往往不復迷朝集扶桑東夕降若木西

守道遺榮利趨物喪其真詘伸難並觀高尚良可倫不
見玄廬子精神已無存煌煌口中珠含此誰為珍富貴

焉足求甘我賤與貧

朝游東海上親見安期生袖攜麻姑書揖予上天行忽
忽從之去一舉陵太清白榆何歷歷桂樹亦青青朱爵
七十二鼓翼相和鳴玉女顧我笑執手戲紫庭萬歲同
娛樂天地長齊并

游仙

精衛填東海焚焚累形軀哲人匡宇宙天命不可須聞
有山林士棄世以自娛願言從之游齋潔練羽書丹池

可止渴晨餐咀雲珠度紀諒非難去去勿躊躇

贈孟望之

二首

昔余與君子未見心相知邂逅在今辰果若平生時願
得結歡好贈予以新詩含意未及申行行復何之念當
從此去傷惶出郊畿行人倦往塗終言與我違倉卒執
手間歎息空相持媿無晨風翼送子起翻飛

跼蹐郊野外白日匿西山行人去有期安得久周旋請
為游子吟與子結纏綿憂來動人心惻愴不能言言念

平生友意氣非徒然行役不足辭貧賤非所憐君其篤
明信慰我心惓惓

田中築舍修治樹藝

莊生卧濠梁范子去海隅行止信難侔遠跡要不殊伊
予慕棲遁脫冠歸里閭卜宅近郊坰葺宇就田廬南榮
面崇岡北牖背幽墟雖非山水地取樂自有餘築牖仍
先趾穿池即故渠林木盡舊行圃畦皆曩區寡欲罕所
營衆美亦云俱爵祿無常位貧賤亦安居豈惟畏淹留

得以免憂虞懽此平生情永言焉可渝

丙子十月二十八日初發鄉邑述征有作

旅宦忝從事卧疴輟歸田俛仰似昨日荏苒踰三年末
路謝貞素積習慚寅緣整駕別鄉邑薄言重徂遷瞻途
背梁宋振策指幽燕昔往遺維繫今來就糾纏豈伊行
役歎畏此平生譽嬰世迫物累撫化懷冥筌齊契百年
內高揖千載前慮存跡匪虧意愜道仍全斯言俟明哲
因歌遂成篇

月夜坐憶

明月三五時流光千里外
虛館風冷冷寒墀霜靄靄
不見南樓客徒憶西園蓋
懼酒無盈觴憂襟有餘帶
沈吟

靜夜思緬邈佳人會

陳卧子
云俊雅

詠燭

客醉北堂上花生夜戶中
色亂歌梁月影弄舞衣風
珠簾照不隔羅幌映疑空
願得陪長讌相看曲未終

雜詩

二首

植草會成蔓種木當為株休咎豈虛生景響不相踰呂
生釣竒貨蘇子挾陰符六國假相印萬戶割名都一朝
計不售倉卒蒙罪辜狙詐適自困傾巧定焉如生時諒
非榮既沒辱有餘達人安貧賤貴欲弭禍樞

玉以采自斲丹以澤自銷高才耀當時荼毒竟相招傳
子感飛蛾張公喻鷦鷯思患豈不微履險果焉逃嗟哉
世路間覆轍常所遭千金憚垂堂胥靡易登高願隨方
外士杖策歸蓬蒿

舟中看雨

微照下亭皋輕雲翳川曲一望春波上蕭條煙雨綠餘
花飄近渚衆鳥喧深竹借問同行子何處停舟宿

日暮

日暮坐東軒直望西山曲白雲藹藹至雨我牕前竹茲
晨憚隆暑披衣廢朝沐徙倚乘夕涼清風散炎燠大象
幹流行變化一何速日新諒無取年長祇多辱古人善
補過嗟爾當自勛

北征

地闊塵沙外天寒霜露中
燕雲常少日朔氣自兼風
夢斷南樓鳥愁隨北向鴻
淹留憶攀桂辛苦歎飄蓬

九日同何仲默出郊

九日登高會同人載酒來寒城
一以眺秋色正堪哀零
雨晨初霽浮雲午未開
南飛有鴻鴈為爾立徘徊

答王允升省中對雨見憶之作

康樂愁霖唱平原
苦雨詩故人歌此曲
贈我慰相思
辟

金髮月
卷四十
荔垂青閣芙蓉汎綠池今朝一樽酒最恨不同持

送毛敬父之廬州

北峽吞淮口東陵控海隅霍山分岳鎮肥水混濡須從事之官遠觀風問俗殊廬江多小吏應候府中趨

七月十五夜對月

娟娟涼風夕紛紛零露時秋來看明月風露已如斯況對西園酌兼懷康樂詩山中有桂樹今夜足相思

六月八日西闕遇雨

窈窕西清內參差水殿連歸雲向平樂飛雨集甘泉
明月裁班女迴風唱麗娟龍池初望幸來往木蘭船

重游蕭氏園

別此真如昨重游換物華粉滋曾倚竹紅淺舊看花
沙阪縈林曲山籬逐水斜城南咫尺路未覺往來賒

負郭

負郭茅堂小臨溪竹圃斜山樽移野客魚網曬鄰家
荒徑封殘雪疎籬透晚霞預思春到日著處種桃花

玄明宮後圃石山

出郭仙城近探幽福地遙珠林行窈窕錦石上岑薨雲
裏仙人酒山中玉女蕭蓬萊去何許東望海邊潮

村居

寂寞村居僻荒蕪草徑深飛蓬來曠野啄木響空林薄
落腳凝望清江正苦吟此生甘落魄自笑果何心

送周子賢按貴州

萬里牂柯路炎洲百粵南懸梯穿鳥道流沫下龍潭赤

坂黿鼉出玄厓日月含虹霓蒸海氣煙霧灑春嵐飛獨
綠篁竹垂援墮石楠橘花香細細藤刺綠毵毵嶺外青
驄馭臺中白筆簪秦冠高鐵柱漢節照金函行邁應多
暇登臨素所耽江山吟謝客物色助清談送遠都無緒
憂時且不堪安危廷諍地遲子促朝參

送劉遵教赴河南僉事兼河北兵備

暫輟臺中妙兼分閫外名兩河開幕府萬里作長城卻
穀真堪帥穰苴本善兵追奔立表待傳檄據鞍成盜賊

空三輔煙塵掃北平閭閻無夜警部曲有春耕風勁吹
龍角雲輕抱翠旌遙瞻猛將氣偏逐使君行

寄崔內翰

病起身仍健秋來興不孤心情那可減肺氣欲全蘇蟻
穴依牀席蛛絲織畫圖褰帷窺物色倚杖理荒蕪撥悶
憑詩卷忘形付酒壺昔賢遺軌躅餘力誓馳驅良史傳
經術高才繼典謨赤鯨凌海水翠鳳上天衢仙籍通羣
帝丈星近六符馬遷慙實錄劉向謝醇儒玄覽來神契

冥搜入奧區蓬萊披琬琰太乙下虛無顧我惟書肆知
君類說邪憲章崇闕里辭賦陋鴻都東魯宮牆閔西京
戶牖殊百家流汎濫六藝混泥塗未覩崩頽振深思筆
削扶飛騰愁失墜衰颯迫號呼落落親朋遠悠悠歲月
徂提攜如有分終願託微軀

送楊石齋

社稷功成後山林避寵年遭逢誰可竝出處獨超然反
側當前日經綸邁昔賢殷憂興聖主至治格皇天凶豎

同摧朽蒼生盡解懸廟謨隨指顧臣節見周旋智勇千
夫敵勲勞百辟先賞仍虛裂土名已重凌煙握璽慚周
勃揮金笑魯連急流嫵盛滿介石慕貞堅許國心恒切
還鄉興偶牽留侯初相漢樂毅晚辭燕異渥絲綸數高
風進退全草亭黃閣詔花簇錦江船水檻星橋側茅堂
雪嶺邊雲霞深綠野卉木富平泉事業存鐘鼎儀型照
簡編累朝瞻翊戴四海憶陶甄白首歸休記青春送別
筵衣冠望行色端不異登仙

寒食對雨遣悶

一百五日春已深
閉門風雨晝陰陰
乍飛燕子濕無那
欲折桃花嬌不禁
歸去久淹滄海興
愁來端擬白頭吟

天涯節序堪愁思

一作厭見
繁華節

更遣蕭條斷客心

贈繼之

長安城中不可留
風塵日日使人愁
上書解綬我將去
拔劍出門君且休
五岳登臨幾兩屐
三江來往一扁舟
東西南北好行樂
與爾相隨萬里遊

孫氏沱西別業

已陵西來沱水深水邊樓閣長

一作自

陰陰鼃鼃夜出洞

庭岸虎豹晝啼雲夢林鼓柁乍逢漁父笑塞舟時聽越

人吟卜居何日從公去擬向桃花處處尋

一作避地欲從何地隱買

山須就此山岑

流觴渠

流觴泛激水手攬跳波濕恰怪杯行遲風吹忽相及

雲洞

洞門雙玉扇隔岫窺雲霧裊裊三石梁苔滑不敢度

折楊柳

三月盧龍塞沙中雪未乾朝來折楊柳春色憶長安

涼州詞

隴西西去抵涼州邊塞蕭條處處愁青草不生青海曲
黑雲常聚黑山頭

皇帝行幸南京歌

燕姬玉袖抱瑩篴馬上常隨翠輦游春來照影秦淮水

愛殺江南雲母舟

雪

綠水初冰百子池
飛花正滿萬年枝
君王夜醉瑤臺雪
侍女冬歌白苧詞

春日漫興

二月黃鸝滿樹飛
歌喉宛轉世間稀
謝公雖有東山妓
不及儂家金縷衣

顧璘 三首

璵字英玉上元人璘之弟正德甲戌進士除南京工部主事改兵部歷郎中謫知許州遷溫州府同知升山東按察僉事終河南按察副使有寒松齋存橐

詩話英玉為東橋從弟東橋詩有落魄吾家蘇季子風流南郡小馮君蓋謫牧許州時所寄也東橋闢息園以延賓客載酒促膝諸亭朋簪滿座伎樂雜陳而英玉居隔一牆臨街小樓曰寒松齋者坐卧其上訓童子以自給所謂名教之外別有風猷者邪

再游石門洞

蒼然括東山百里縈青碧石門忽中斷窈窕開仙宅遙
窺日月深却轉煙霧隔中天屹樓居星斗挂几席芳巖
肱綺繡叢巘圍蒼壁山鬼不避人驚猿嘯窺客披榛上
孤亭竒觀壯心魄穹崖倚天懸瀑水半空射高流橫雜
佩直下垂足帛分作四山喧散為千頃澤初冬天未寒
晨曦映嵐赫重來意彌眷獨往任所適信美愜心期胡
為老行役終然脫塵網高舉凌風翮

游西山宿廣智寺待月

本來游客意欲與月明期碧海深何許清光望轉遲
草香聞露墜林暗見星垂幸對尊中酒殷勤坐不辭

壽州題壁

去郡今千里還家尚幾程春風楊柳色相送石頭城

劉天民

五首

天民字希尹歷城人正德甲戌進士除戶部主
事諫南巡受笞闕下改吏部諫大禮又受笞歷
文選郎中調知壽州累遷河南按察副使改四

川以計典罷有函山先生集

詩話函山諫草兩陳再答闕下其調知壽州也
故事京官外謫出都時以眼紗自蔽過部門選
人擁其馬不得前函山擲紗于地曰吾無媿於
官俾汝輩見吾面目可耳蔡鶴江送以詩云元
祐黨人滄海外貞元朝士曉星前王耕原送以
詩云君不見盤中紫脂蟹疇昔橫行今安在又
不見坐上虎皮褥當年負嵎思殺人世間反覆
那可數鄙夫何事用心苦蓋以刺讒人也晚又
以計吏罷憤懣不平恒逃于詞曲有云把俺這
沒嫂嫂的陳平也串下一個招李中麓每稱之

漳河

雲寒不離水騰作漳河霧葭莢稅嚴霜蒼茫未能渡斥

鹵際廣野望之迴積素憶昔趙魏時兵馬日馳驚公子
納遊俠結轍滿皇路佐國無定謀中原徒指顧享費壯
士金招延詞客賦豪華坐銷爍曾如草頭露坐食三千
人化為萬年墓哀哉丘中墟遺蹤遍狐兔

巴田

巴田不成井逐壟細開塍灌水分山溜燒畬去野芳三
時勤不輟八口飽方能寄謝當塗子民心未有恒

謝豹

謝豹豈人化哀鳴自可憐無端啼永夜不為客孤眠悄
悄風歸樹娟娟月在天訴深情轉劇血盡眼將穿

渭南道中用韻答黃汝厓方伯

隴水秦關道路均春風花柳著行新烏巾斜日久折角
白酒誰家堪入脣晚歲始醒蝴蝶夢故園今返鹿麋身
天涯尺牘勞相問猶是漁磯舊友人

宮詞

黃花細雨掩金鋪罷却鍼工一事無才報成雙又分去

人間博戲等樗蒲

鍾梁一首

梁字彥材海鹽人正德甲戌進士授刑部主事
進郎中諫南巡杖闕下尋出知濟南府乞歸用
薦補南昌知府有西臬集

感事

師老寒潮上民勞烈火中是誰司國計何以慰宸聰憤
世多才子平戎少令公杞人憂不細掩袂向東風

林春澤 二首

春澤字德敷候官人正德甲戌進士授戶部主
事遷貢外謫寧州同知歷吉安通判肇慶同知
召為南京刑部郎中出知程番府有人瑞翁集
詩話百年上壽世曰徒然然或有過之者吾錄
滕安卿詩既援崑山周大賓新昌呂翁粗舉其
本末矣候官林太守德敷百歲有司為建人瑞
坊榮之集中喜玄孫生詩云傳家二十有三世
老我百年仍四春蓋即於是年卒萬曆癸未歲
也德敷子應亮戶部右侍郎孫如楚工部右侍
郎

次潞河作

朝發都城闐夕宿路河舟雁落沙渚淨霜降菰蒲秋天
寒節物換河漢曉夜流回望郭隗臺黃金不可求廢興
已陳迹懷古心悠悠

中秋清源公署

萬里秋光旅夜清空庭倚杖轉傷情月明偏照干戈地
風冷唯聞鼓角聲東海魚龍俱寂寞南枝烏鵲尚飄零
天衣欲把思無力愁絕長安北斗城

陳九川 一首

九川字惟濬別字竹亭又號明水臨川人正德
甲戌進士授太常博士坐諫南巡削籍世祖即
位復官遷儀制司員外轉主客郎中下詔獄謫
戍鎮海衛尋放還有明水先生集

詩話明水釋褐忽曰漆雕開謂吾斯之未能信
吾可自信與遂上疏請告歸謁陽明講學及官
博士與舒修撰梓溪夏貢外東洲萬主事五溪
共諫南巡一時有四君子之目既司主客為羣
小所憎重獲罪可謂信道之篤而九
死不悔者也詩非所長亦小有韻致

題桃源圖

偶攜鄉里入山川一隔塵寰幾百年世上祇言秦網密
桃源也有不租田

戴欽一首

欽字時亮柳州人正德甲戌進士官刑部郎中
有鹿原集

同諸公寺中對雪

入寺金沙淨開林素雪飛風含珠閣動花傷藥闌輝酒

伴能相覓春筵賞不違仙郎有高唱轉覺和人稀

張治道

四首

治道字孟獨一字時濟長安人正德甲戌進士

授長垣知縣遷刑部主事有太微前後集

王衡云

孟獨詩凌駕古今長篇如天馬行空王元美云張孟獨如罵陣兵瞋目揎袖果勢壯往李時遠云孟獨七言優於五言一時闕中諸公當出其下

與薛君采夜話

入夜杯仍把論交淚暗揮醉憐山

一作城

月上愁對海雲

飛江漢三年阻風塵萬事非故鄉南北遠猶恨不同歸

聞雁

何事天南雁春來又北飛為憂霜雪苦轉見羽毛稀江
漢愁余阻瀟湘笑汝違雲霄蹤跡異空有淚沾衣

白鷺

沙頭白鷺鷺飛向青山閣日暮行人稀還向沙頭落

清明日

草沒尚書履花迷御史驄長安佳麗處偏在曲江東

明詩綜卷四十

欽定四庫全書

明詩綜卷四十一

翰林院檢討朱彝尊編

舒芬一首

芬字國裳進賢人正德丁丑賜進士第一授翰林修撰以諫南巡受杖謫福建鹽課司副提舉嘉靖初議大禮再杖歸卒有梓溪集

靜志居詩話舒公首犯逆鱗幾斃于杖其撰崇德李君墓志中書本末最詳謹抄撮于左始車

駕議以三月十九日壬子東巡祀岱宗歷徐揚
抵南京下蘇州復沂江浮漢登太和山人情洶
洶懼變將相大臣多愆患之十五日予率同館
先上疏兵部黃輩伯固陸震時亨疏亦上為太
宰陸完所沮是夕夏良勝于中萬潮汝信過予
憤惋邀太常陳九川至署名明日吏部張衍慶
元承刑部陸倕天爵等疏亦入又明日禮部姜
龍應賓兵部孫鳳鳴和行人余廷瓚伯獻等俱
連疏入時又有太醫院醫士徐鏊以醫諫車駕
不果出矣癸丑上忽震怒下黃輩陸震夏良勝
萬潮陳九川于錦衣衛獄以舒芬張衍慶姜龍
孫鳳陸倕等百有七人跪午門外五日而行人
司疏不報以通政司璽之也乙卯余廷瓚等俱
下獄丙辰同黃輩等六人亦跪午門外五日梏
拳是日工部林大輅以乘等三人大理寺周子
厚等十人亦連疏入丙辰俱下之獄亦梏拳跪

五日時復有金吾衛指揮張英言車駕出必不利肉袒戰及於胷以死諫天威遂不可霽戊午
芬等一百有七人午門受杖四月己卯杖輩等
六人發徐鑿邊遠充軍林大輅周叙余廷瓚俱
受杖時死杖下者陸汝亨劉宗夏何孟循林質
夫劉珏余伯獻孟子乾劉平甫李德卿詹敬子
李崇德十有一人崇德諱紹賢盱眙人以行人
齋孝貞純皇后遺詔至徐州開讀時羣阹勢熏
炙率屬吏視州衛官偃然席班首君立紹左從
容令去其席撫不得與職官同禮焉其文比之
實錄所紀尤詳詩頗涉理學語五言如江花迎
載酒沙鳥避歸航菊黃三徑冷巖翠一松存七
言如水入枕楞流去響風吹魚網過來腥思家
我亦愁千里為客誰能耐十年紅粉滿樓初入
趙青山百里尚圍蕪芳草有情生夜雨天桃如
夢繞春山未如莊子舟藏壑欲買謝公墩結廬

高樹閒雲輕護鶴小橋新水淺通魚芹香華屋
來玄鳥樹暗青山隱杜鵑誰為剪殘今夜悲獨
憐開盡故園花
皆薦然有致

東流遇雨

歲晏東流縣江雲黯寂寥雨滋帆葉重風急浪花飄鴻
雁飛何遠蛟龍舞更驕客懷何處遣隔岸酒旗招

崔桐一首

桐字來鳳海門人正德丁丑賜進士第三累官
南京禮部右侍郎有東洲集

玉虛山行

是處瑤宮敞隨山羽客棲雲根百里路木杪萬重梯人
語鳴虛壑鷄聲報隔溪桃源知不遠欲徃路仍迷

夏言八首

言字公謹貴溪人正德丁丑進士授行人歷吏
科都給事中改翰林侍讀學士累官少師吏部
尚書兼華蓋殿大學士後棄市追謚文愍有桂

洲集

顧玄言云相君優於詞自成別調頗多豔藻
穆敬甫云夏公律法精嚴間出逸趣

李舒章云文慰詩頗長
應制第有形模而少氣色

詩語貴溪游覽贈酬之作不及分宜而應制
詩篇投頌合雅不若袁文榮之近於褻也

保定公館書坐

重門掩長晝槐陰知午過瓦雀上階行青蟲抱絲墮公
暇亦憑几好風時入座終羨南村翁悠哉北牕卧

安鄉道中觀婦人插田

南村北村競栽禾新婦小姑兼阿婆青裙束腰白裹首
手擲新秧如擲梭打鼓不停歌不息似比男兒更膂力

自古男耕女專織憐爾一身勤兩役吁嗟乎長安多少
閨中人十指不動金滿身

無逸殿西壁詩應制

睿藻承遺訓農歌啟聖衷千秋無所逸七月詠豳風帝
學詩書在神謀制作同光昭文祖業原上有新宮

秋日同李序菴顧未齋張亭溪飲鄭氏莊

雨後沙全濕風前竹半斜野橋通細水秋圃映餘花出
郭悲塵鞅臨池憶釣槎清歌且終日應不問年華

夜泊吳江

月岸秋燈滅風湖夕浪翻
橋連楓葉冷城帶水雲昏
把燭延津吏停舟次驛門
漁歌起何處瀟灑數家村

漢川道中

晚市浮烟歛春洲曲水連
遙燈林表亂圓月浪中偏
犬吠經村店蛙鳴逼稻田
夜行三十里野興得蕭然

次薛西原

背郭茅齋僻沿堤竹徑斜
杖藜逢野客酌酒共山家
暖

日熏芳草寒流漾淺沙江村二三月歲歲足鶯花

象麓草堂初成和杜

水碧沙明洲渚迴籬深竹靜草堂開風吹山木蕭蕭下
日落江帆片片來有客相過時載酒主人無事日登臺
愁看直北關山迴白草黃雲秋正哀

王邦瑞一首

邦瑞字惟賢宜陽人正德丁丑進士改庶吉士
累官兵部尚書贈太子少保謚襄毅有集

伏羌道中

曉發天水郡西行見城堡茅屋十餘家周垣亦百堵門
前挂弓箭牆上施樓櫓居處雜牛羊街衢塞糞土危峰
列戍臺疾騎飛傳羽一夕烽火至居人自比伍我從漢
中來悠悠思徃古此地戎馬區從來多荼苦漢有隗囂
據唐為吐蕃部宋人扼金遼歲歲苦侵侮干戈如鼎沸
生靈飼豺虎皇天眷明德聖作乾坤覩窮塞入版圖混
一歸神武向來蹂踐場禾黍皆膻膻承平思預防綢繆

在牖戶勿使邊防弛寇入臨洮府

蔡經 五首

經字廷彞候官人後復姓張正德丁丑進士累
官南京兵部尚書總督浙直軍務改左都御史
為趙文華所劾逮至京論死追謚襄愍有半洲
集

詩話襄愍死非其罪郡志寃之國史白之虞山
錢氏以為東南之論殊不然傳聞異辭不可不
覈以余所聞趙文華病篤命禱其平生所陷六
人襄愍其一則文華已心悔其誣且與楊忠愍

同日死於市公論亦可定矣
其詩特清婉無拔劍橫槊氣

同漳源侍郎遊華不注峰并泛大明湖

平生慕幽曠雅懷避煩囂
林園苟成趣亦足供逍遙
况茲出東郭雲物如相招
羣山秀孌娜一峰特峯堯
開筵坐琳宇浩歌凌紫霄
朋情藉軒豁客思翻飄飄
矇言泛運沼復爾移蘭橈
窈窕遵玄浦逶迤渡七橋
菰蒲水清淺石竹風蕭條
槐陰宿鳥下藻動潛鱗跳
何緣對淑景且幸聯高標
因探歷城勝并采康衢謠

中山早行

客夢長不成，鷄聲起偏早。
既無夜寐安寧，似晨興好。
銀河澹欲沉，朱炎寂猶埽。
搖旆指秦關，駕車歷周道。
古塔振風鈴，高槐護芳草。
對此忘驅馳，翻以舒懷抱。

己丑陪祀南郊

歲序南郊重，齋居北闕虔。
金輿下霄漢，寶篆裊雲烟。
肅穆千官靜，歡呼萬姓傳。
天風引仙樂，清切最堪憐。

鵞湖道中

鷺湖山下春可憐
野梅含雨柳生烟
遊絲細細駐林杪
浴鷺悠悠飛水田
物候催人如過客
朔雲回首忽經年
征衣尚拂紅塵路
悵望鄉關落照邊

蘭河曉渡

月落金城鼓角殘
危關曉色拂雕鞍
黃河渺渺中原隔
紫塞迢迢邊地寒
西望旌旗連瀚海
東來風雪滿臯蘭
萍踪萬里休惆悵
虎節龍沙亦壯觀

張岳

三首

岳字維喬惠安人正德丁丑進士除行人疏諫
南巡受杖調南國子學正入為武選員外歷祠
祭郎中出為廣西提學僉事調江西謫廣東鹽
課提舉遷知廉州府轉浙江提學副使歷叅政
以僉都御史撫治鄖陽改江西尋以右副都御
史總督兩廣軍務召入為刑部侍郎掌都察院
事復出總督楚蜀卒贈太子少保謚襄惠有小
山類橐

詩話襄惠初釋褐與林希元陳琛談理學時目
為泉州三狂始以言禮忤永嘉繼忤貴溪分宜
幸以功名終文治武功所至登績詩其餘技然
如宛宛西飛日餘光照我裳江空流月華白石
光凌亂理深物有悟興極感相因幽篁迷舊蹊
回蹬距飛轍微風萬里陰落日半江烟非熟精
文選理者
不能作也

留客亭

憑軒有所思所思在遠岑我有青絲瑟欲奏無知音
萋萋芳草色遲遲美人心佳期不可敦離憂故難任
冥迷風雨交歎息河梁深歸來卧山中浪浪涕霑襟
願垂空

谷駒翩翩夕巖陰桂枝聊攀折芳馨日相尋山阿華歲
晏莫受霜霰侵

同翁夢山游三海巖

夙愛山水遊茲山屢延賞披雲入青冥巖屋岼敞玲
瓏開北戶峭壁排銀榜初駭溜石懸漸喜瓊芽長幽泉
時一滴毛骨森蕭爽壺觴屢獻酬清言激靈響天末多
風波陳迹成俯仰徒聞海上洲中宵勤夢想聊茲永日
留真性非外獎暝色望征途何由釋塵鞅

興夢山登欽州東城樓

登高易為感况茲萬里心
高城餘百雉翠色前山深
詰屈水通海蒼茫日載陰
美人隔宵旦末由攬芳襟
舉手招青鳥願託瑤華音
青鳥不我顧瑤華日以沉
耿耿還自念有酒且共斟

許宗魯二十二首

宗魯字伯誠一字東侯咸寧人正德丁丑進士
改庶吉士授監察御史歷湖南按察僉事副使

太僕少卿大理少卿以僉都御史撫保定以副

都御史撫遼東有少華陵下遼海歸田等集

元王

美云許伯誠如賈胡子作狎游隨事揮散無論
中節 蔣仲舒云中丞五七言位置句穩首尾
妥潔氣格羸備可當作手使更推思入玄取材
進古得不溫溫其言哉 黃清甫云許詩字句
嚴飭篇章方整得古人之格白溝之作弔古慨
今辭意俱盡志士讀之求見深衷定當擊節可
謂無慙前作其近體雖多直語亦有爽氣曩
秉鉞兩方戎事倥偬不廢文翰彌見其高
詩話少華諸體皆工寓和婉於悲壯之中譬
之秦箏獨無西氣足與邊廷實王子衡並驅

渡白溝

昔運邁屯厄恒紀變參商南風日不競朔吹亦遠揚英
雄各垂御龍戰血玄黃矯矯平將軍獨立當中央張弧
射九日撫劍盼四方事去迹故隳志伸願已償竭來歲
月久道里未能忘仲生固有為忽死亦其常停驂覽故
壘雪涕履戰場清川帶滌紆白骨浩縱橫枕歎不能發
總轡歌此章

贈楊伯雨

昔與君為別乃在黃金臺高歌易水曲落日悲風來今

與君相逢乃在廣陵郡朔雪滿江湖冉冉歲華盡與君
昔紅顏雙鬢忽已素日月如逝川東流焉得住酌酒勸
君飲援琴為君歌起望長江雲澹澹垂綠波丈夫有心
期結交共終始南山青桂枝豈為歲寒死

己酉元日作

檢歷年華改看雲歲色新地天開泰日星斗建寅春去
國身何遠趨朝夢轉頻江湖與廊廟憂樂竟誰人

三月三日

上巳今朝是風光異往時海雲成雪易塞柳得春遲目
極關山道情懸曲水詩誰能修禊遠一浣望鄉思

遼左雪中登樓

歲杪崇朝雪天涯絕塞城凍雲連海色枯木助風聲懷
土情無已登樓賦未成梅花南國思笛裏暮愁生

東岳

秩祀嚴東土明禋冠五宗金函神鬼錄玉簡帝王封海
湧中宵日巖留上古松何時凌巖嶺飛舉跨蒼龍

登岳陽樓

澤水含秋盛樓光向晚孤倚闌聞白鴈把酒對蒼梧楚
客悲今昔湘靈怨有無興來留賞地落日下平湖

零陵西亭同朱大叅袁楊僉憲材賦

入洞探幽蹟登臺散遠心雷聲帶雨重虹影射江深地
接三苗國天垂八桂林來游陪二妙詞賦總南金

自清溪泛舟出江與柯元卿話別

清溪澹無色客子放歸舟浦暗黃花雨江行白露秋故

人惜遠別尊酒話中流漸近銅陵縣青山動我愁

送馮子言還吳

夢寐東吳好相違幾歲華憐君理歸櫂秋色滿天涯
醉詠江樓月晴看海寺霞春來如憶我須寄早梅花

自毘陵如姑蘇

仙舟搖極浦驛路指吳門海氣春冬雜風潮日月昏
鴈回書不到家遠夢空繁總是江南好何如歸故園

晚渡黃河

落日西山暗，洪河夏漲餘。
昏黃沉鞞洛，浩渺極梁徐。
鼓聽臨流驛，燈看遠岸漁。
頻年在行役，倚櫂一長吁。

西苑

畫閣橫青漢，雕臺俯碧流。
苑雲低度雨，宮樹早生秋。
水抱芙蓉殿，山連翡翠樓。
何須浮海外，即此見瀛洲。

徐氏南莊秋集

九月重逢閏一年，秋未殘城南。
時載酒樓上，復憑闌黃菊霜前放。
青山雨外看，病軀猶自可不畏倚高寒。

立秋日曲江別業作

垂柳畫陰陰
村居門巷深
秋光來此日
時序感吾心
水鳥浮沉浴
風蟬斷續吟
江臯餘暑在
竹下且披襟

邊事

先皇神武竝周宣
北伐親兵駐萬全
飲馬幾思臨瀚海
銘功何止勒燕然
龍沙夜靜妖星落
虎帳秋高漢月懸
分間登壇諸將老
至尊宵旰獨憂邊

石首昭烈廟

永安宮裏龍髯斷石首山頭寢廟孤
三峽風烟沉王氣
千年營壘識雄圖時移玉殿丹青古
雪暗滄江雁鶩呼
噓燼可憐延漢祚遺靈猶見禱荆巫

醫閭春望同李戶部

醫閭登眺倚雄邊遼左封疆指顧全
山勢北來連靺鞨
海雲東盡辨朝鮮巖花競暖霏香雪
塞草留春藹翠烟
公暇暫問淹永日喜無烽火報甘泉

登齊山樓

近郭危樓俯碧湍，倦游孤客倚層闌。
淮淝山色尊前出，吳楚江流畫裏看。
旅思逢秋增短鬢，鄉心隨鴈過長安。
黃花白酒登高日，玉笛金笳起暮寒。

班婕妤

妾命由來薄，君恩豈異同。
自憐團扇冷，不敢怨秋風。

春興

野霽花爭發，川長柳漸齊。
春光更何許，多在杜陵西。

城南游覽

楊柳今無渚芙蓉舊有園請看蒿里地即是樂游原

戴鰲四首

鰲字時重鄞人正德丁丑進士除刑部主事歷

官右副都御史巡撫四川有東石遺橐

李杲堂云中丞

擅經世才負氣高亢居官四十餘年闕節不至其門權貴俱心憚之竟坐此三起三黜不得盡其用論者惜焉其詩老健蒼涼是一作手

感興三首

高梧有良質斲為雙綺琴疏絃映金徽冷冷發佳音一

彈薰風至更彈江月沉大雅久以寂志士寄幽吟坐令
衆喧息洞見太古心

蘭蕙種不長荆棘日以滋青青野中蔓引身百尺枝春
風一吹拂垂垂得其宜夭桃開上苑苦李道傍遺賦命
固如此物情胡不怡托根各有所聊用以自持

離離庭樹花風日正妍好翻翻辭枝葉忽已及秋杪君
子心百年小人計昏曉請君平生志慎勿事溫飽

宣風公館作家書後用壁間陽明先生韻

雲外微紅見燒痕道邊寒水入溪渾此時日落楚山館
後夜月明何處村已近閉關猶道路偶逢傳札念晨昏
獨燒官燭看妻子卧聽郵更驚夢魂

胡侍四首

侍字承之咸寧人正德丁丑進士除刑部主事

進員外陞鴻臚寺少卿坐議大禮謫潞州同知

尋下詔獄論為民尋命復職有濠谿集

王元美云胡承

之如病措大習白猿公
術操舞如度擊刺未堪

詩話承之詩原北地而五言頗近信陽弇州稱之云雖於風雅未縣合往往時材骨格殊亦不

失實

宴王御史惟人山亭

別館秋城側高亭夕霧中
疏簾通野色曲磴裊天風
醉舞招松鶴悲吟和草蟲
平生習池興遶莫笑山翁

九日同陳魯南文徵仲劉希隱薛君采登海印寺
鏡光閣

湖景澄珠閣雲虹度石梁
行攀雙樹杪坐對九華觴
水

抱香城入山橫紫禁長憑高不厭晚待月詠胡牀

送劉德徵守夔府

國有蠶叢古城聞白帝雄龍蛇夏禹廟雲雨楚王宮羽
檄通南徼樓船進北風還令蜀父老喜得漢文翁

涼州詞

落日黃河水倒流沙場旌旆風悠悠新降番兒不解語
笛中吹出古涼州

陳文沛一首

文沛字維德長樂人正德丁丑進士除工部主
事歷郎中出知撫州府調蘇州遷霸州兵備副
使以陝西行太僕寺卿罷歸有世槐堂橐

懷遠堡和韻

峭壁樓危石徒杠漫遠沙河流隨溜曲樹影逐風斜客
枕移更鼓鄉愁起暮笳官齋何寂寞鄰舍兩三家

吳仲一首

仲字亞甫武進人正德丁丑進士歷官南京太

僕寺少卿有鴻爪集

送吳舍人使中州

茅土分封重天書十道開浮槎垂月渡飛舄倚天迴南
國王孫草西園驛使梅荆溪何處是遙在白雲隈

汪佃 二首

佃字友之弋陽人正德丁丑進士改庶吉士有

東麓集

苑口別意圖為弋陽李生題

金八八八八八
卷四十一
秋來苑口漲初生
羨爾歸帆一片輕
折柳離亭休弄笛
客邊禁得斷腸聲

雨行

落花飛絮踏成泥
烟雨連纖日向西
行客正愁行不得
鷓鴣偏傍馬前啼

林希元一首

希元字思獻晉江人
正德丁丑進士官至大理

寺丞有次厓集

丁酉除夕有感

牢落天涯兩歲除，夢中曾幾賦歸與。
聖朝未有寬恩詔，邊郡猶勞判事書。
忙裏不知殘臘去，客邊惟覺二毛疎。
椒盤此夜誰觴酒，忽憶家鄉萬里餘。

李士允一首

士允字子中，祥符人。正德丁丑進士，歷官陝西參政，兼苑馬寺卿，有山藏集。

晚過劉中丞園

暝色延春徑
烟花啟夜關
綠深裴相野
香滿白公山
銀燭回花底
金壺侍竹間
不妨山簡馬
乘醉月中還

王漸達一首

漸達字用儀番禺人正德丁丑進士授刑部主事建言不報乞歸隆慶初追贈光祿少卿有青

羅集

洪舜臣云青羅詩文如騏驥在御雖鳴鑾節奏而若減若沒之氣終不可掩

詩話青羅詩無定格遺興即題鐵橋一絕直追踪唐許碣閬苑花前之作

鐵橋

狂客山中不費招
瑤池春宴夜聞簫
醉餘不記歸時路
曾跨青羊過鐵橋

曹嘉一首

嘉字仲禮扶溝人正德丁丑進士改庶吉士授
御史以言事出補大名府推官尋復官御史又
以言事下獄謫禹城知縣降茂州判官仍復原
職升山西提學副使終江西右布政使有漫山

集

王元美云曹仲禮如公孫大孃弟子
舞劍頗見淋漓見其師者不覺愜然

詩話王元美撰卮言謂獻吉晚為其甥曹嘉所
厄良苦而鄉黨之論不然朱秉器游宦餘談述
汴人語謂仲禮終身父事獻吉勿衰梓行舅氏
集選吳下以善書名者繕寫獻吉兄孟和有姊
即仲禮母素與獻吉有隙恒不相見一日兄姊
欲過獻吉獻吉喜劇盛供饌以俟比入門獻吉
出近方揖孟和即踣獻吉于階兄姊交毆之時
仲禮在都聞之惶懼不寧者旬日專人以書慰
獻吉是厄其舅者非仲禮矣仲禮好賓客所與
游最密者詩則謝茂秦書則徐子仁奕則閻子
明嘗語茂秦云吾舅氏稱詩家練字不如練句
練句不如練意練意不如練格蓋墨守舅說若
是以此知卮言亦
有不足深信者

次韻答空同舅氏

兩度微官謫孤身絕塞行
漢廷收墮淚蜀道軫離情
玉壘蠶叢國龍標劒閣城
乾坤形勝地何處挂冠纓

王廷陳 三十五首

廷陳字稚欽黃岡人正德丁丑進士改庶吉士授吏科給事中諫南巡杖謫裕州知州尋下獄

免歸有夢澤集

皇甫子循云稚欽樂府古詩齊軌潘陸下擬陰何五律並肩沈

杜

俞汝成云夢澤詩清切不凡滌潤可愛

王元美云王稚欽如良馬走坂美女舞竿五言尤自長城穆敬甫云稚欽如阮嗣宗日坐步兵厨醉態百出而自無寒酸語顧玄言云王

給事調高趣新頗多奇句如深谷綿蠻冷然幽響殆與高岑方軌蔣春甫云稚欽五言漸近自然頗多佳境陳卧子云稚欽真俊故意警而調圓李舒章云稚欽操筆不煩軒然鵠舉

宋韓文云稚欽才情麗逸儻加以沉思當不減徐昌穀

詩話稚欽逸藻波騰雕文霞蔚音高秋色艷春蘭樂府古詩既多精詣五言近體亦是長城固以邈後凌前足稱才子

擬矯志篇

蛟龍雖困不資凡魚

一作鮪

鸞鸞雖孤不匹鸞雛雖有香

草當戶必除雖有仁人在敵必誅孤白雖美炎暑必置

舟車之用易地則棄蘭蕙不采無異蓬蒿千將不試世
比鉛刀以驥捕鼠曾不如狸餓夫獲璧不如得糜郭生
純臣魯連高士彼乃登臺此則蹈海寧直見伐無為曲
全寧渴而死不飲盜泉

放歌行

竊鈎者誅竊國者王仁義資亂道豈不臧

一解

伐秦者呂

襲楚者黃歇魏國君大盜在傍

二解

謂尺何短謂寸則長

此不可度彼何可量

三解

獸殪罟裂鳥盡弓藏智勇既殫

軀乃見殃

四解

讒巧為忠直夫稱狂出門異趨毀譽曷常

五解

樂不可極憂來無方游心沖虛以保壽康

六解

妾薄命

春風轉蕙披蘭高臺曲榭中連經堂入奧張筵秦箏趙
瑟俱前鳴絃度曲雙妍輕舉紈袖僂僂宛若游龍翔鸞
翠盤金爵闌干呈能角技為歡種種厭射更端眼看陽
景西馳高張蘭燭承暉車倦馬怠不辭但歌不醉無歸
夜深坐促尊移含悰寫意向誰衆中色授君知願言竝

帶雙棲惡聞易別輕離佇立不勝傷
獨宿寤言難忘
何以報君明璫起視銀河爛光牛女咫尺相望終夜不

成報章

陳卧子云調本
子建聲情極合

行路難

北風蕭蕭雨雪滂辭我親友之朔方中
閨少婦走傷惶
勸君斗酒牽衣裳道路縱橫多虎狼
歲暮天寒百草黃
結髮本期不下堂君獨何為慕他鄉
東流水不西歸
宛轉蛾眉能幾時人生富貴亦有命
辛苦馳奔空爾為

子夜春歌

初華綿繡舒千林望如一懷春廢機杼縑素難成匹

子夜秋歌

貪看秋月光夜久不成寢四顧寂無人玉階有雙影

對酒歌 二首

惠施已不作莊生寡所宣伯牙失鍾期抱琴誰為彈知
人誠不易知己良獨難周公輔王室管蔡乃流言骨肉
且不諒他人固宜然

人性稟靜躁物則準方圓錐刀各有能情好各有妍陰
霽難竝祈恩怨豈兩全於此雖不容於彼獲所安人無
億萬身何能徧周旋兼濟聖不贍榮枯有自然富而如
可求尼父願執鞭

詠懷四首

兩儀立樞要萬事具紀綱智士運機權一童驅百羊羽
重金或輕尺短寸有長壯夫苟失據反為豎子傷獨繭
引六鼇纖繳連雙鷁操持貴不謬得失詎有常始悟制

人術豈在多與強

擊鼓以求亡疾馳以逃影驅介以乘高驟震以求騁揮
及喪其柄振衣失其領趨舍昧良圖存亡在俄頃

姬旦制冠裳萬古承其責偶以衣狙獠奔騰裂且棄承
雲本妙音鱗羽爭辟易魯門鐘鼓聲轉使爰居悸物類
何繽紛人已非一致避哉尼父言蓋各言爾志

昔聞有游女逍遙翔碧潯交甫下請佩解贈情亦深可
遇不可持變化愁予心影滅佩亦失漢廣無由尋眄睇

絕髣歸徘徊逮夕陰青鳥忽來過貽我金石音憂思耿
難忘寫意於鳴琴自傷非儔類感激長悲吟

雜興

偏才互短長名家殊去取連城償燕石千金寧敝帚不
識東家聖翻謂西施醜定價豈目前知己俟身後

閨情

種木期息陰結交期得心與君初婚時安坐調瑟瑟繫
我大秦珠貽我玳瑁簪攜手同車遊徘徊步春林俯拾

竝蒂花仰聽和鳴禽折芳交贈持言誓一何深寧期被
讒妒棄我忽如沉曠歲不一接塵埃生錦衾明月入空
帷中夜坐悲吟發篋理故物淚下誰能禁

別張子言

我友駕言邁去去之朔方晨起促中廚為我具酒漿長
別在須臾且願盡杯觴昔為骨肉親比翼雲中翔今當
永乖違邈若參與商出門異鄉縣居世如朝霜世途轉
傾側良會安可常羸馬感人情哀鳴衢路傍悲風振喬

林颯颯摧中腸執手不能辭淚下霑衣裳恨無凌風翰
送子還故鄉

別曹仲禮

四首

與君一為別晷度逝不傳奄忽二十載親串日以零短
者已物化存者非壯齡况復異鄉縣散處如晨星但言
長相思豈意今合并顏鬢各已改不易惟茲情孤鴻號
朔風黃鳥聲嚶嚶飛鳥戀儔匹况乃稱友生

別子大河測見子長江濱對面但疑歎含意慘莫陳豈

無新知歡念此同袍人攀留不須臾羲陽忽以淪奮身
思繫日天路邈無因安得附高翮一舉摩青旻飽者豈
念饑貴者羞賤貧薄終古所尤交誼貴在伸故心苟不
移何必會合頻慷慨即長路無為兒女仁

中夜起相送白露塗我襟低頭惜分手舉頭傷辰參斗
酒良不薄對之不能斟唧唧草間蟲助我揚悲吟為君
拭綠綺彈作清商音物理關人情淚下不可禁谷風刺
小怨孔公贊同心延陵輕寶劍高義垂至今親交信不

薄先民良可欽

冷冷山下澗童童山上松
鄰鄰澗中石瑟瑟松上風
波逝石不俱颺奔松莫從
物理相倚藉動息難可同
與君游宛雒矯若雙飛龍
中道悵相失末路欣此逢
既逢不須臾去復當嚴冬
霜霰集衡輅虎豹啼林叢
子其慎桑榆勞謙以令終

駕幸南海子

南郊初禮帝上苑復誇胡
虎兇先聲伏車徒翼輦趨
網

羅張一面部曲用三驅侍從羣臣在應知諫獵無

江上言懷二首

野闊風雲入天迴楚蜀通渚禽多白鷺巖樹半青楓哀
怨湘君曲平成夏后功晚來懷古意極目送冥鴻

平野蒼烟合高城白鳥過澤蘭懷楚客石竹隱湘娥谷
響歸樵唱江鳴發櫂歌夕陽葭茨外將奈暮愁何

楚眺

眺迴臨高閣三湘萬里餘草邊雲夢獵花下武陵漁白

日山川氣清秋水竹居仙蹤同霸業消歇總愁予

李沔陽自大梁經裕州因贈

雪夜梁王宴霜秋宋玉愁回瞻嵩嶽峙去逐楚江流少
室三花樹滄浪一葉舟南行正搖落知爾憶林丘

張子魚過訪

故人天上至清宴夜深開澤畔微芳度江臯暝色迴楓
林傳翠幙月岸擁金壘正苦歡娛逼無令候吏催

生日有感簡同館漢東少泉二子

五十年來是行藏往日非因之念親舊存者亦幾希
矢心猶壯文章力已微操觚從二子衰薄謝餘暉

宴魏子園亭

池館名江國賓朋實楚材屏間烟霧濕鏡裏菱荷開
鶴以吹笙下漁因鼓瑟來邀一作盡歡須秉燭歌妓莫頻催

病中得顏子書并見示諸作

卧病當寒景空齋正爾思五禽終日戲雙鯉遠方貽
久著潛夫論初傳幼婦碑君才猶不用如我復何悲

春日山居 二首

野曠林爭出花深徑屢迴
春風芳草外亂水白雲隈
燕接飛蟲去鶯沾落絮來
小堂宜竹護一一荷鋤栽

草動三江色林占萬壑晴
籬邊春水至簷際暖雲生
溪犬迎船吠鄰鷄上樹鳴
鹿門何必去此地可躬耕

山莊雜興 二首

老夫諳稼穡次第葺園廬
對酒惟田父呼門絕里胥
桑麻經雨後花竹宛秦餘
如此生涯足何勞薦子虛

事去心逾壯年來迹轉孤
濯纓臨漢沔安枕荷黃虞
春澗偏魚鳥秋牕近竹梧
出逢鄰叟飲醉倩野童扶

聞箏

花月可憐春房櫳映玉人思
絲纖指亂愁劇翠蛾顰授
色歌頻變留賓態轉新曲終
仍自叙家世本西秦

病後答友人

一畝居連郢客鄉三年愁隔漢川長
青山各有幽棲志白雪遙傳寡和章
自倚雲霞開藥圃不將塵土灑荷裳

洞庭雪後烟波濶花底垂舟到草堂

燕京元夕曲

香車一一渡星橋翠袖雙雙引玉簫
但訝遊人爭辟易不知夫壻漢嫖姚

江暉四首

暉字景孚仁和人正德丁丑進士改庶吉士諫
南巡杖闕下出為廣德州知州召授編修進修
撰升河南按察僉事有賈爰子集

陳卧子云景孚好怪合者

亦六朝

之遺

詩話景孚穿文鑒句辭必自鑄其文有令繼閣
始理訓闡詰範詔已邛臬揆原命稽彞九篇誦
之若神經怪牒蓋做魁紀公而作王稚欽贈以
詩云江生突兀揚文風千奇萬怪難與窮博物
豈惟精爾雅識字何止過揚雄古心已出丘索
上還音或與神明通求深索隱不肯置一言忌
使流俗同令第大篆逼鐘鼎絕藝恥作斯邕等
生也為文遺弟書一出皆稱二難竝縱有楚史
不可讀滿堂觀者徒張目少年往往致譏評生
也不言但捫腹讀未終篇覺殷仲堪之眸子裴
叔則之頰毛傳寫畢露矣景孚詩稍
文從字順然豈可與稚欽竝稱耶

別劉子謙

天運無停機變化一何速四時更迭謝寒暑互往復雷
霆促晝陰霜霰棲寒谷萬卉隨隙光安能久蕃育傷彼
蕙蘭花凋零竝蕭藋芳猶竟同岑賦命焉可卜

前上陵德勝門

先皇巡狩日此地即行宮拜舞千官肅飛揚八駿雄雕
弓開塞霧鼉鼓振山風今日繇華歇重過恨不窮

謁康陵

五柞淹珠葆千杉閔玉襦靈山鍾自肅虛殿珮仍趨雪

暗蛟龍蟄雲寒燕雀呼塵沙迷列岫何處訊蒼梧

感聞

南極雲山阻中天貝錦盈如何去與住俱似甯中行迂
拙甘衰病飄零寄友生秋風蓬戶底蕭瑟旅魂驚

馬汝驥

三首

汝驥字仲房綏德州人正德丁丑進士改庶吉
士諫南巡罰跪闕下五日受杖出知澤州召還
為編修歷修撰國子司業南京右通政南京國

子祭酒升禮部右侍郎兼侍讀學士卒贈尚書

謚文簡有西玄集

王元美云馬仲房如程衛尉屯西營斥堠精嚴甲仗雄整

而士乏樂用之氣顧玄言云侍郎優於律取法初唐尤多華整但少情性耳黃清甫云仲房詩整練似法顏謝隊伍森然且闕中之產氣自不薄雖求之聲律未造其深亦不失高流也

蔣仲舒云仲房詩

有沉理而無玄趣

詩話仲房派沿北地由其體純存滓窳而舍神明雖與稚欽齊稱去而千里

酬明卿見遲之作

違時寡朋侶在世有羈縛雖抱投沙懷中欽臨海作美

人惠前顧軒車戒雙駱探幽肆廣筵握炙行高爵宴晤
稽故懽告別附新諾沁渚既繇芊樓峰復聯絡捫蘿情
易暢攀桂興欲躍嚴程豈迂遠郵館祇淹泊復往瑤華
篇報桃恥涼薄吁嗟山水音非子諒誰託寄言儲醇醕
俟我乎偕樂

藏舟浦

鳳殿臨瑤水龍舟鏤白雲樓臺疑上漢簫鼓憶橫汾地
豈昆明鑿波猶太液分昔年浮萬里蘭桂詠繽紛

芭蕉園

路轉山樓直園開水殿低
碧荷春檻出紅藥晚階齊
釣石蛟龍隱歌臺鳥雀啼
翠華當日幸一道綠天迷

劉士奇一首

士奇字邦正廣州順德

一云龍門

人正德丁丑進士

除刑部主事諫大禮杖闕下遷郎中出知梧州
府歷山東右布政使

秋夜旅懷

為客方如晉還家復入秦音書徒屬望燈火自相親草
色連朝改砧聲向晚頻那堪千里外猶有未歸人

王謳二首

謳字舜夫白水人正德丁丑進士除工部主事

遷刑部員外郎出為按察僉事有彭衙集

王子衡云

舜夫如敗鐵網取珊瑚用力堅深得寶自少

康德涵云舜夫才情之妙近日罕觀典麗咸備

機軸不凡蓋作者之雋也蔣仲舒云舜夫頗

饒氣格兼多沉思惜其純駿相半如披沙揀金

治璞取玉

殊勞匠手

詩話舜夫詩多至千六百篇譬田甫田種豆成
其若苗有莠當屬閭中下農夜行一篇其汙萊
之嘉穀乎

夜行

夜行如在旦殘月清林光雲氣集深澗露華生早涼白
沙鬱浩浩翠壁凝蒼蒼寂歷松柏徑經過花草香鷄聲
互村落曙色動柴桑即事況多感離心含永傷

送姚方伯

野日流沙白山城落木黃秋來長送別何處折垂楊

汪應軫一首

應軫字子宿紹興山陰人正德丁丑進士改庶

吉士諫南巡廷杖出知泗州嘉靖初召復館職

授給事中出為江西按察僉事有青湖文集

葉仁

甫云先生以沉鬱澹雅之思出以溫厚和平之詞譬之太羹味之正也

詩話青湖知泗州康陵南巡中使傳旨俾進美人善歌吹者奏言泗州僻左婦女不諳歌吹惟民間醜婦能慧儻納之宮中受蠶事庶於治化有裨遂寢事雖迂而實可傳也及卒鄉人私謚曰清憲先生蓋司諫為直臣牧民為廉吏講學為醇儒皆第一流也其論學詩云語道豈捐陸

扶世常從朱黜然思聖功二家皆真儒
審擇於鸞鹿之間非偏黨陽明可知

登浮峰寺

攝衣入空山白雲留我住我欲卧白雲白雲又飛去

王鳳靈

三首

鳳靈字應時莆田人正德丁丑進士歷官參政

有筆峰存橐

次梁學泉吏部徐州舟中夜酌之作

石仄江逾勁峰迴日易斜歸鴻迷極浦飛鷺落平沙越

客同杯酒春光正
柳花相看仍意氣
行路莫深嗟

送林遷于得告還山

祖席初分酒半醺
相看無奈故人何
生憎柳色臨歧路
況聽春聲入櫓歌
舊國雲山何處是
他年風雨憶君多
祇園簪組能相絆
未得相從訪薜蘿

次韻贈送鄧文溪刺維摩

青瑣黃門記昔遊
諫書常出殿西頭
須知九死當年事
豈分孤身萬里投
瘴雨蠻烟仍壯節
海雲江月重離憂

最憐號泣攀轅意誰為中原赤子謀

吳鼎一首

鼎字維新錢塘人正德丁丑進士歷官廣西布政司參議有泉亭集

讀史有感

漢武雄才世莫倫輪臺一詔見天真滿朝都入平津閣
猶有淮陽卧病人

陳良謨一首

良謨字中夫安吉人正德丁丑進士除工部主
事歷官貴州參政有天目山房橐

詩話中夫生十月而孤母都夫人躬教之學既
第奉母入京邸水涸卧小舟中夜呻吟母責之
曰貧生出入徒步若初入官便思安逸縱此一
念吾立見汝敗矣中夫泣伏罪歷任以清介聞歸
田後入峴山社年已九十賦詩云夙
駕侵寒露歸帆拂暮星興復不淺

三窮辭為周侍御作

菰塘霜冷高烟平孤雁失偶中夜鳴深閨嫠婦心獨驚
蘭膏無燄爆有聲盈盈淚落如斷縻妾心有苦誰則知

上有舅姑下有子與爾同生不同死

陸金一首

金字德如吳江人正德丁丑進士授工部主事
歷官江西按察副使

宿京口驛

風帆如馬過維揚滿目烟花路渺茫江上潮痕收暮雨
渡頭人影立斜陽十年季子裘應敝三月王孫草正芳
今夜月明京口驛計程應喜近家鄉

許相卿四首

相卿字伯台海寧人正德丁丑進士官兵科給

事中補禮科致仕有雲村集

董實甫云先生詩悲壯沉著格調高

遠

詩話雲村澹於宦情居紫雲山四十年風花雪
瀑游履遍於巖椒而不一入城市其卒也聞人
嘉言輒以詩云平生城市無雙履何物榮衰到
兩眉蓋實錄也詩取適意集出其手刪自序謂
棄其脫遺不可讀者存其餘可讀者自題絕句
云雲村病老語多隴造次詩成雜宋腔還湖開
元論風格拾遺壇上樹旌幢由今誦之諸體亦
自清潤不全雜以宋腔也若老如舊歷渾無用

病戀殘燈亦暫明
此則宋腔之佳者

古意

新月生西嶺明河低遠林坐見大火中秋序忽見侵感
歎老將至徘徊勞我心勞心復誰語聊撫東廂琴調高
曲未竟寡和難為音矯首文江子何時宣此襟

諸弟夜集

獻歲閏霖潦今夕欣澄和況我遠行歸兄弟會匪他晏
晏言笑洽楚楚壺尊羅東風舉衣袖明月在庭柯一觴

再三詠舞影時婆娑在萬百年內白日如投梭載懷秉
燭遊不樂如夜何

晚晴

苦雨連旬日初晴一振衣殘雲依海嶠新水到柴扉僻
性嫌山淺塵緣與世違斜陽疎樹裏清影石邊歸

霽色

霽色林廬晚愁吟野水灣斷雲虹外雨殘日鳥邊山海
宇堪流涕朝班祗強顏獨嗟身世拙早見髭毛斑

楊士雲 五首

士雲字從龍雲南太和人正德丁丑進士改庶

吉士授工科給事中歷戶科左給事中有弘山

集

詩話給事未老抽簪自號九龍真逸坐卧小樓
訂尚書蔡傳之得失撰黑水集證自春秋以來
迄於元季歷代人物各詠以詩又取天文歷象
律呂及皇極經世書地志皆分題成詠可謂好
學也已其詩原出自沙定山近取裁於楊用修
同時吳懋以給事及王廷表胡庭祿張含李元
陽唐錡為楊門六學
士六人皆滇產也

四望謠

望蓬萊駕蒼龍東如瓜獻木公

望崑崙駭白虎觴九霞進王母

讀尚書

二十八篇今自漢伏生授二十五篇古至晉梅賾奏二十八宿外二十五宿又仲尼不可作誰復百篇舊

八月十五夜月

今夜中秋月當圓尚未圓人皆瞻白兔我欲問青天把

酒須來夕高歌似去年盈虛誰握算擬測子雲玄

春事龍關作

春事今過二月中登山載酒喜相同三點兩點社公雨
十番五番花信風子規啼血欲半夜蝴蝶掠香時一叢
醉餘白石高歌調日落水流西復東

曹弘 二首

弘字毅之江陰人正德丁丑進士除知南豐縣
入為監察御史西川清軍以病還里有方湖集

御史馬子肇朱必東李明德陳良會主事林汝恒
俱以言事忤旨罷職謫官於其行詩以送之

海樹連雲暗燕花帶雨飛啼鶯三月暮逐客五人歸聖
代昭臣直危言犯主威賜環應有日留却舊朝衣

下夷陵

溪花丰茸溪雨涼雲水不分前路長山鳥一聲山竹裂
思君半夜發瀟湘

朱豹三首

豹字子文上海人正德丁丑進士知奉化餘姚
二縣擢監察御史出知福州府有朱福州集

送顧經歷之福建

京華倦羈旅憂思喜南天烟柳山頭驛春溪樹杪船官
清蓮幕靜地暖荔枝鮮況值干戈少詩篇紀歲年

秋日遣懷

雲物蕭條僧舍荒砌封蒼蘚半迴廊坐來草樹俱搖落
望入關山更渺茫憂國淚邊秋色老思家夢裏雨聲長

臨風却羨天涯鴈去啄江南晚稻香

寄程以道

隴梅隄柳又春風客子光陰似轉蓬此日天涯千里隔
昔年花底一尊同西川蹤迹孤雲外南浦離愁細雨中
早晚瞿塘新水發雙魚煩爾下巴東

袁淮一首

淮字伯昭任邱人正德丁丑進士歷官知府有

汾淮泗西征諸集

秋夜宿堠馬驛寄舍弟渙

月騎停沙浦風林出驛樓
青燈萬里客玉露九霄秋
失路添星鬢還家滯驛舟
未成春草夢徒有越鄉愁

廖世昭一首

世昭字師賢懷安人正德丁丑進士除知海州
改國子博士卒于官有越坡臺

定光塔登高

寶塔層層上危欄面面開
秋城圍野曲遠水接天迴
日

射珠光迴風迎鐸響哀長安知萬里目斷朔雲堆

郭波一首

波字澄卿閩縣人正德丁丑進士戶部主事有

巖存臺

宿坪塘鋪

獨樹郵亭影千山征路塵東鄉今夜月偏照未歸人

明詩綜卷四十一